

# ARUBA LO DISPONE DI UN REGISTRO CIVIL COMPLETAMENTE MODERNO

ORANJESTAD (AAN) - Den contacto cu comunidad, cu ta un trabao special di DIARIO cu opinion publico, a bini acerca e comentario di un señora, tocante e sistema di traha di Registro Civil, unda ni e ambtenaar ni e cliente tin privacidad. E publico mester ventila hopi datonan personal y hasta priva dilanti tur esnan cu ta den rij, pa un of otro tramite concerni na e departamento ey. E señora ta kere cu e sistema ta masha inadecuado mes e incomodo, y segun su opinion mester bin un cambio.

## LO BIN CAMBIO

DIARIO a haya na su lugar pa tuma contacto cu señor Pablo di Registro Civil pa conoce su opinion al respecto, y pa conoce si tin al-

gun plan ta andando pa Registro Civil mehora su prestacion di servicio.

El a admiti cu e persona cu a duna redaccion tal opinion tin razon, pero cu tin cambio pa futuro cercano.

"E cambio ta biniendo. Ta berdad cu e edificio aki no ta adecuado y no tin privacidad pa e publico atende cu e ambtenaar. Aña pasa caba a pone e prome piedra pa nos edificio bini na Cero Blanco, y nan a buta como fecha pa e edificio ta cla na mediados di aña 1994. Den e departamento nobo lo tin hasta hoekinan priva manera tin na banconan. E sala di spera lo ta hopi mas grandi y lo traha cu number", señor Pablo a duna di conoce.

El a sigui bisa cu ya caba tabata tin contacto cu Domein Beheer, na cual el a duna su

proyecto. Ta asina cu actualmente tin mas of menos 100 cliente pa dia, y si ta Dialuna hasta hopi mas cu esey, y sigur e sistema di atencion no ta cuadra cu e diferente necesidad di e publico.

Di nan banda e ambtenaarnan mester traha den loketnan tapa cu glass cu ta haci nan obliga pa grita pa e cliente por tende, mientras cu e cliente mester duna contesta na cierto preguntanan, hopi biaha di nan bida priva, manera den caso di reconocimiento di un yiu, entre otro. Di un banda e publico tin razon pero di otro e empleado mester puntra ya cu pa duna servicio no ta keda otro alternativa pasobra ta informacion necesario nan mester pa esaki.

Señor Pablo tin debido cuenta cu e procedimiento aki, y asina el a bisa gobierno tambe.

Den futuro lo bin 10 loket nobo pa atende cada necesidad, y nan lo ta na cierto distancia di otro unda cu hasta e cantidad di hende den rij lo bira menos. Lo tin un sistema di hoeki full cera cu ta duna pa cierto tramitenan e privacidad necesario pa e ambtenaar y e cliente, unda ningun hende lo bay tende nan conversacion.

Señor Pablo ta completamente conciente di e necesidad pa e proyecto aki bira un realidad, y sigur pueblo di Aruba lo keda pendiente riba dicho plan, pa e no keda stanca.